

Lesley Griffiths AS

Gweinidog yr Amgylchedd, Ynni a Materion Gwledig

5 Hydref 2020

Annwyl Lesley

Ymateb y Pwyllgor i'r adroddiad ar y Memorandwm Cydsyniad Deddfwriaethol Atodol (Memorandwm Rhif 2) ar y Bil Pysgodfeydd, a materion yn ymwneud â'r Memorandwm Cydsyniad Deddfwriaethol Atodol (Memorandwm Rhif 4) ar y Bil Pysgodfeydd

Diolch am eich llythyr dyddiedig 1 Hydref 2020 sy'n cynnwys eich **ymateb** i'r argymhellion yn ein **hadroddiad ar y Memorandwm Cydsyniad Deddfwriaethol Atodol (Memorandwm Rhif 2) ar y Bil Pysgodfeydd**, ynghyd â rhywfaint o wybodaeth am yr hyn sydd wedi'i gynnwys yn y **Memorandwm Cydsyniad Deddfwriaethol Atodol (Memorandwm Rhif 4)** (a osodwyd ar 1 Hydref 2020) a'r diwygiadau ychwanegol a geisir yn ystod y Cyfnod Adrodd yn Nhŷ'r Cyffredin.

Yn ogystal â hyn, roedd yn ddefnyddiol inni gael yr ohebiaeth rhyngoch chi a'r Is-Ysgrifennydd Gwladol Seneddol, Victoria Prentis AS, ar y cytundeb rydych chi wedi'i geisio mewn perthynas â darpariaethau'r Bil ynghylch penderfynu ar gyfleoedd pysgota.

Gan mai ar 1 Hydref y cafodd Memorandwm Rhif 4 ei osod, byddwch yn amlwg yn deall ei bod bron yn amhosibl ymgymryd â gwaith craffu cyn y ddadl yfory ar y cynnig cydsyniad deddfwriaethol ar y Bil. Rydym hefyd wedi nodi nad yw Memorandwm Rhif 4 yn adlewyrchu'r wybodaeth rydych chi wedi'i darparu i ni yn eich llythyr dyddiedig 1 Hydref ynghylch y diwygiadau ychwanegol a geisir yn y Cyfnod Adrodd yn Nhŷ'r Cyffredin.

Credwn fod angen ichi egluro nifer o bwyntiau ymhellach, a hynny mewn perthynas â Memorandwm Rhif 4 a'r diwygiadau ychwanegol rydych chi'n eu disgrifio yn eich llythyr, a hynny ar fyrder. At hynny, mae nifer o faterion yr hoffem eu trafod ymhellach â chi yn ymwneud â'ch ymateb i'n hadroddiad ar y Memorandwm Cydsyniad Deddfwriaethol Atodol Rhif 2.



Senedd Cymru

Bae Caerdydd, Caerdydd, CF99 1SN

✉ SeneddDCC@senedd.cymru

☎ 0300 200 6565

Welsh Parliament

Cardiff Bay, Cardiff, CF99 1SN

✉ SeneddLJC@senedd.wales

☎ 0300 200 6565

1. O ran diwygiadau rhif 144, 145 a 146 Llywodraeth y DU a wnaed yn y Cyfnod Pwyllgor yn Nhŷ'r Cyffredin ond na chyfeiriwyd atynt yn y Memorandwm Cydsyniad Deddfwriaethol Atodol (Memorandwm Rhif 3), rydym wedi nodi bod Llywodraeth Cymru wedi ceisio'r diwygiadau hyn "i sicrhau bod cwmpas pwerau Gweinidogion Cymru o dan Atodlen 8 yn cyd-fynd â chymhwysedd Senedd Cymru". Fodd bynnag, nid yw'n amlwg i ni fod angen y diwygiadau hyn a hoffem ichi fanylu ar hyn.
2. O ran y diwygiadau ychwanegol a geisir yn y Cyfnod Adrodd yn Nhŷ'r Cyffredin:
 - a. Pa ddiwygiadau a geisir i gymhwyso *Deddf Deddfwriaeth (Cymru) 2019* i is-ddeddfwriaeth a wneir o dan y Bil (wedi iddo ddod yn ddeddf), a pham mae angen y diwygiadau hyn?
 - b. Pa ddiwygiadau a geisir i ddarparu'r pwerau sydd, yn eich barn chi, yn angenrheidiol er mwyn i'r gweinyddiaethau pysgodfeydd allu ymrwmo i drefniadau asiantaeth "a fyddai'n galluogi cydweithredu ac arfer swyddogaethau'n effeithlon er mwyn cyflawni canlyniadau cadarn ac effeithiol o ran rheoli pysgodfeydd" ac, unwaith eto pam mae angen y rhain?
 - c. Sut rydych chi'n gobeithio gwella Atodlenni 3 ac 8 o ran "cwmpas a gweithrediad pwerau Gweinidogion Cymru a'u perthynas â phwerau cyfatebol yr Ysgrifennydd Gwladol"?
 - d. Pa ddiwygiadau rydych chi wedi'u ceisio i ofynion yr ymgynghoriad sy'n berthnasol i bwerau Gweinidogion Cymru i wneud gorchmynion o dan adran 134A a 134B?
 - e. Pam rydych chi'n ceisio'r diwygiadau hyn mor hwyr yn y broses?
3. Ynglŷn â'ch ymateb i'r argymhellion yn ein hadroddiad ar Femorandwm Cydsyniad Deddfwriaethol Atodol Rhif 2:
 - a. Rydym yn cydnabod bod eich llythyr at yr Ysgrifennydd Gwladol Seneddol ynghylch penderfynu ar gyfleoedd pysgota yn nodi'n glir yr hyn rydych chi'n ei ddisgwyl o unrhyw gytundeb rhynglywodraethol yn y dyfodol. Fodd bynnag, nid yw'n eglur i ni sut mae'r ymateb a gawsoch yn cadarnhau ac yn derbyn y gofynion a'r disgwyliadau a nodwyd yn eich llythyr. A ydych chi'n fodlon ar ymateb yr Ysgrifennydd Gwladol Seneddol ac, os felly, pam, o ystyried y diffyg eglurder?
 - b. Pam rydych chi o'r farn ei bod yn ddigonol ymrwmo i gyflwyno adroddiad i'r Senedd bob dwy flynedd ar weithredu'r darpariaethau yn y Bil sy'n ymwneud â Chymru yn unig, hyd nes y cyflwynir Bil Pysgodfeydd Cymru, yn lle cynnwys darpariaeth machlud yn y ddeddfwriaeth?
 - c. Nid ydym yn credu'ch bod wedi egluro o dan ba amgylchiadau y byddai Gweinidogion Cymru yn ei hystyried yn hwylus arfer y pwerau yn Atodlen 3 fel awdurdod trwyddedu pysgod môr. At hyn, mae cwestiynau eraill yn codi o'ch ymateb. Rydych wedi dweud "Nid oes gennym unrhyw gynlluniau ar hyn o bryd i ddefnyddio'r pwerau hyn, ond **byddwn yn nodi y gallai'r pwerau trwyddedu hyn fod yn rhan o'r llyfr statud am nifer o flynyddoedd, degawdau o bosibl** (*ein pwyslais ni*), fel deddfwriaeth sylfaenol flaenorol ar gyfer trwyddedu pysgota môr. O'r herwydd, mae angen y pŵer hwn arnom, ac i'r un graddau y bydd gan awdurdodau trwyddedu pysgota môr eraill y DU, i atodi amodau i drwyddedau sydd i'w gweld yn angenrheidiol neu'n hwylus, i



ymateb i unrhyw anghenion wrth iddynt newid i sicrhau bod trefniadau trwyddedu pysgodfeydd yn gyfredol ac yn addas at y diben." Pam rydych chi'n ystyried ei bod yn angenrheidiol ac yn briodol i Fil y DU gymryd pwerau a allai fod yn rhan o'r llyfr statud am ddegawdau er mai dim ond trefniant dros dro i reoli pysgodfeydd yng Nghymru oedd hwn i fod?

O ran argymhellion 6 a 7 yn ein hadroddiad ar Femorandwm Cydsyniad Deddfwriaethol Atodol Rhif 2, nodwn eich ymateb ond rydym yn parhau i bryderu y gallai'r Senedd fod yn colli pwerau.

Un pwynt olaf yr hoffem dynnu sylw ato yw'r camddealltwriaeth anffodus sy'n cloi'ch llythyr at y Pwyllgor. Nid ydym wedi dweud y byddem yn argymhell rhoi cydsyniad yn amodol ar eglurder a sicrwydd.

Er mwyn cynorthwyo'r Aelodau i wneud penderfyniad yn ystod y ddadl y Cyfarfod Llawn yfory, byddwn yn eich annog i ddarparu'r eglurder yr ydym wedi gofyn amdano pan fyddwch yn cyfrannu at y ddadl.

Hoffwn ofyn ichi hefyd ymateb yn llawn i'r llythyr hwn cyn gynted â phosibl.

Rwy'n anfon copi o'r llythyr hwn at Mike Hedges AS, Cadeirydd y Pwyllgor Newid Hinsawdd, Amgylchedd a Materion Gwledig.

Yn gywir



Mick Antoniw AS
Cadeirydd y Pwyllgor Deddfwriaeth, Cyfiawnder a'r Cyfansoddiad

Croesewir gohebiaeth yn Gymraeg neu Saesneg
We welcome correspondence in Welsh or English

